

*Minister Oduber:*

## ATIA satisfecho cu contestanan ricibi durante reunion di All-inclusive



**ORANJESTAD - Den Parlamento di Aruba dentro di poco tin tratamento di un ley cu lo conoce cambionan specialmente pa locual ta trata All-inclusive y esaki sigur a genera hopi discusion. Hunta di directiva di ATIA y entre su miembronan tambe genera diferente pregunta pa cual e organisacion a pidi un reunion cu Minister Otmar Oduber.**

Minister Oduber a invita tur tres instancia huridico cu a traha riba e ley, esta Departamento di Legislacion, mr. Allan F. Kuster di oficina di abogado Kuster, y for di Corsou oficina di abogado van Eps Kunneman van Doorne.

Tambe oficina di turismo tabata presente den e reunion. Tur pa sigura cu tin contesta pa tur pregunta of inquietud cu por tin pa cu e cambio di ley aki.

Desde aña pasa e organisacion cu ta representa gran parti di e sector comercial riba nos isla, ATIA, a vocifera nan mes contra e fenomeno creciente di All-inclusive.

ATIA ta di opinion cu esaki tin un efecto negativo directamente riba e negoshinan cu tin pafo di e hotelnan. Ta trata aki di tanto restaurantnan of tiendanan cu tambe ta miembro di ATIA. E presidente di ATIA Sr. Michel Henriquez ta satisfecho cu e contestanan ricibi y awor ta bay bek den nan seno pa comparti e infor-



macion ricibi.

Sra. Ronella Tjin Asjoe-Croes di ATA cu tambe a forma parti di e reunion ta kere cu mester tuma accion contrario na no haci nada.

Sra. Tjin Asjoe-Croes ta kere den plattformanan manera e reunion aki ta di suma importancia pa por comparti resultado di varios investigacionnan haci y treciendo asina tambe nan punto di bista dilanti. E directora di oficina di turismo ta mira cu den un termino basta corto, considerando e tendencia nan, lo por tin aki un par di aña riba e strip di Palm Beach acomodacionnan exclusivamente All-inclusive por ehempel. P'esey ta asina importante pa tuma accion y discuti e topi-

conan di preocupacion cu ta bin dilanti cu e tendencia di All-inclusive. For di e dialogo hiba Minister Otmar Oduber ta mira cu tabata tin hopi informacion cu berdad no tabata conoci pa ATIA.

A muestra e organisacion di comercio riba e proceso cu a wordo hiba unda cu a sinta entre otro cu AHATA. Minister Oduber ta mira cu AHATA tin dos diferente grupo dividi cu ta e operadornan di e hotelnan y di otro banda tin e doñonan di e propiedad unda cada un tin nan propio interes. E mandatario ta indica cu e ley di All-inclusive ta na interes general di Pais Aruba. Mientras cu a reuni cu ATIA mester bisa cu Minister a ricibi hopi carta

di diferente organisacionnan manera taxistanan, wholesalers, AGA, otro restaurantnan, companianan di importacion y asina por sigui menciona, tur cu e preocupacion pa e posibel aumento di acomodacionnan All-inclusive na Aruba y lo kier mira esaki regula den un ley.

E mandatario ta comenta cu e ta un discusion cu no a inicia awor pero cu a haya mas atencion na momento di benta di Westin. Minister Oduber ta referi na e ultimo 3 di e 4 transaccionnan cu a tuma luga a cumpra un permiso existente.

“No ta facilmente por bisa ban pone reglanan nobo pa hotelnan nobo siendo cu e ehempel cu nos tin di e ultimo 3 propiedadnan, casi 4 propiedadnan, tabata di hotelnan existente cu permisonan existente, cu a wordo cumpra pa operadornan di acomodacionnan All-inclusive.” Minister Oduber ta termina bisando cu e tambe ta mira atras na un bon reunion y ta sigur cu e tipo di dialogonan aki lo continua den e dianan nos dilanti pa formula e discusion cu lo conclui den Parlamento di Aruba. E mandatario ta spera cu lo pasa e ley aki mas pronto cu ta posibel. □